

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine FBiH", broj:49/06), i člana 26. Statuta općine Banovići ("Službeni Glasnik Općine Banovići", broj: 2/20) člana 31., člana 35. i člana 40. Poslovnika o radu Općinskog vijeća Općine Banovići („Sl.Glasnik Općine Banovići», broj 12/21) Općinsko vijeće Banovići je na prijedlog Etičke komisije časti na 16.(šesnaestoj) redovnoj sjednici održanoj 07.04.2022. godine, utvrdilo:

KODEKS PONAŠANJA IZABRANIH ZVANIČNIKA OPĆINE BANOVIĆI

I-UVODNI DIO

Član 1.

Kodeksom ponašanja izabranih zvaničnika i nosioca izvršnih funkcija Općine Banovići (u daljem tekstu: Kodeks) utvrđuju se načela i standardi ponašanja kojih treba da se pridržavaju izabrani zvaničnici i nosioci izvršnih funkcija Općine Banovići u obavljanju njihovih dužnosti.

Član 2.

Termin "izabrani zvaničnik" označava bilo koje lice koji ima mandat lokalne, zakonodavne i izvršne vlasti.

Član 3.

Svrha Kodeksa je da se njegovim prihvatanjem i dosljednom primjenom uspostave osnovna načela ponašanja i kulture dijaloga, a u cilju promoviranja ugleda i poboljšanja rada Općinskog vijeća i njegovih radnih tijela.

Član 4.

Kodeks sadrži načela i standarde etičkog ponašanja, postupak upoznavanja i prihvatanja, nadzor nad sprovođenjem Kodeksa, te mjere koje se izriču zbog nepridržavanja odredbi Kodeksa.

II - OSNOVNI PRINCIPI PONAŠANJA

Član 5.

Izabrani zvaničnici prihvatanjem svečane izjave ili imenovanjem u svim slučajevima dužni su pridržavati se Ustava, Zakona, Statuta Općine, Kodeksa ponašanja i drugih propisa.

Član 6.

U vršenju povjerene funkcije izabrani zvaničnici služiti će općem interesu, zalagati se za ljudska prava, slobode i ravnopravnost naroda i građana.

Član 7.

U ostvarivanju svojih prava izabrani zvaničnici i nosioci izvršnih funkcija uvijek se ponašaju na način kojim se osigurava dignitet državnih institucija.

Član 8.

U obavljanju dužnosti izabrani zvaničnici i nosioci izvršnih funkcija postupaju sa međusobnim uvažavanjem i tolerancijom uz poštivanje dostojanstva svake ličnosti.

Član 9.

Izabrani zvaničnici i nosioci izvršnih funkcija dužni su se uzdržavati riječi, izraza ili sinonima koje mogu vrijeđati nečije dostojanstvo ili omalovažavati druge i drugačije u pogledu ideologije, rase, vjeroispovjesti, nacije, spola i slično.

Član 10.

U svojim nastupima, govorima, podnescima i drugim službenim radnjama i nastupima, izabrani zvaničnici i nosioci izvršnih funkcija vode računa o zahtjevima profesionalne etike i opće kulture i daju pozitivan primjer najširoj javnosti.

Član 11.

U odnosu prema građanima, a povodom rješavanja i ostvarivanja njihovih zahtjeva, izabrani zvaničnici i nosioci izvršnih funkcija dužni su postupati na zakonit i nepristrasan način, bez favoriziranja i ličnih predrasuda.

Član 12.

Izabrani zvaničnici i nosioci izvršnih funkcija lično su odgovorni za svoje djelovanje, prema tijelu ili građanima koji su ih imenovali te podliježu nadzoru i preispitavanju svog rada u skladu sa odredbama važećih propisa.

Član 13.

U vršenju funkcije izabrani zvaničnici i nosioci izvršne vlasti dužni su poštivati pravo pojedinca na informiranje i učešće pri odlučivanju o aktivnostima od društvenog interesa u skladu sa odredbama važećih propisa.

Član 14.

Tokom obavljanja svoje funkcije izabrani zvaničnici i nosioci izvršnih funkcija moraju se ponašati u skladu sa poslovnicima tijela čiji su članovi.

Član 15.

Izabrani zvaničnici i nosioci izvršnih funkcija dužni su pažljivo pratiti tok sjednice ili sastanka i uzdržavati se od radnji kojima se ometa tok sjednice ili sastanka, kao što su: korištenje mobilnih telefona, napuštanje sjednice, čitanje novina i slično.

Član 16.

Tokom sjednice ili sastanka, izabrani zvaničnici i nosioci izvršnih funkcija moraju se uzdržavati dobacivanja, podsmijavanja i drugih radnji kojima se prekida izlaganje govornika, kao i obraćanja podrugljivim tonom kada repliciraju na izlaganje drugih.

Član 17.

Pri obavljanju funkcije na sjednicama i sastancima, izabrani zvaničnici i nosioci izvršnih funkcija prisustvuju prikladno i uredno odjeveni.

Član 18.

Od izabranih zvaničnika se očekuje da rade na stalnom općem i stručnom obrazovanju i održavaju najviše standarde profesionalizma.

III- POSEBNE OBAVEZE

Član 19.

Izborna kampanja

Kandidat za određenu funkciju u toku kampanje težiti će da glasove birača pridobije poštenim i argumentovanim istupom, bez nekorektnog odnosa (iznošenje neistina prilikom javnih nastupa i putem društvenih mreža) prema svim drugim kandidatima u kampanji.

Član 20.

Zabrana favorizovanja

Odluke izabranih zvaničnika i nosioca izvršnih funkcija zasnivaće se na objektivnosti i suglasnosti sa općim interesom, a nikako na individualnim i grupnim interesima, uz spremnost na odgovornost za svoje odluke.

Član 21.

Sukob interesa

Pored zakonske obaveze kada je izabrani zvaničnik obavezan da se uzdrži od vijećanja i glasanja u određenoj pravnoj stvari kod izabranog zvaničnika postoji i moralna obaveza da se zbog ličnog interesa uzdrži od naprijed navedenih radnji i da na to ukaže prije otvaranja rasprave po tom pitanju.

Član 22.

Lične nadležnosti

Pri obavljanju diskrecionih ovlaštenja, izabrani zvaničnici neće za sebe ni za druga lica pribavljati koristi niti bilo kakve pogodnosti.

Član 23.

Način komuniciranja

Izabrani zvaničnici u ostvarivanju komunikacije usmenim putem te putem društvenih mreža, elektronskih i printanih medija, izbjegavaće obmanjivanje građana i šire javnosti iznošenjem neistina i neprovjerenih informacija te neučtivost u kreiranju i vođenju dijaloga.

Član 24.

Povjerenje javnosti

Izabrani zvaničnici svoje ponašanje moraju prilagoditi izbjegavanju konflikata te ga usmjeriti ka izgradnji i osnaživanju povjerenja javnosti prema državnim institucijama.

Član 25.

Zabrana korupcije

Ovaj Kodeks isključuje prihvatanje mita i svakog drugog sličnog ponašanja, što bi se prema važećim propisima moglo podvesti kao aktivno ili pasivno podmićivanje.

Član 26.

Upravljanje resursima

Od izabranih zvaničnika se očekuje da javnim resursima upravljaju na efektivan, efikasan i ekonomičan način isključujući njihovo korištenje u privatne svrhe.

IV- ODNOSI PREMA OPĆINSKOJ UPRAVI

Član 27.

Izabrani zvaničnici onemogućiće imenovanje službenika i namještenika suprotno zakonskim propisima.

Član 28.

Javni zvaničnici će podsticati i razvijati motivacione elemente da svi zaposleni rade brzo i efikasno, stručno i odgovorno, zakonito, pouzdano i kreativno.

V- ODNOS DRŽAVNIH SLUŽBENIKA PREMA JAVNIM ZVANIČNICIMA

Član 29.

Državni službenik je odgovoran prema javnim zvaničnicima i građanima.

Član 30.

Etičke norme ponašanja državnih službenika su detaljnije razrađene u posebnom Kodeksu ponašanja.

VI - OBLAST NADZORA

Član 31.

Izabrani zvaničnici neće spriječavati bilo koju mjeru nadzora koju budu vršili nadležni organi uz uvažavanje izrečene privremene ili konačne odluke.

VII - PRAĆENJE KODEKSA PONAŠANJA

Član 32

Praćenje i nadziranje Kodeksa ponašanja izabраних zvanіčnika vršіće Etička komisija časti imenovana od strane Općinskog vijeća.

Član 33.

Broj članova tijela iz prethodne tačke utvrdit će Općinsko vijeće Odlukom o imenovanju ovog tijela, a činit će ga izabrani predstavnici, predstavnici Civilnog društva i ugledni građani, pri čemu će predstavnici civilnog društva i ugledni građani činiti većinu u Komisiji.

Član 34.

Ovo tijelo donosi Poslovnik o svom radu.

VIII-ŽALBENE PROCEDURE

Član 35.

Građani imaju pravo i mogućnost podnositi predstavke i žalbe za sve oblike kršenja pravila ovog kodeksa, a u prijavi se navode radnje koje čine povredu Kodeksa i dokazi koji to potvrđuju.

Član 36.

Predstavke i žalbe podnose se potpisane u pismenom obliku na adresu tijela iz člana 32. ovog Kodeksa (ul. Alije Dostovića br 1, Stručna služba OV Banovići, Etička komisija časti), ovlašćenog za njegovo praćenje.

Član 37.

Predstavke i žalbe građana razmatraće tijelo određeno za praćenje Kodeksa, koje daje svoje mišljenje u skladu sa Kodeksom ponašanja izabраних zvanіčnika i Poslovnikom o radu etičke komisije koje dostavlja Općinskom vijeću na razmatranje i usvajanje.

Član 38.

Ako tijelo zaduženo za razmatranje predstavki i žalbi građana utvrdi da nije bilo povrede odredbi Kodeksa o tome će obavijestiti pismenim putem podnosioca prijave.

IX - SANKCIJE ZA KRŠENJE KODEKSA

Član 39.

Za nepoštivanje Kodeksa ponašanja primjenjivat će se mjere predviđene Poslovnikom o radu Općinskog vijeća i Poslovnikom Etičke komisije na koji će suglasnost dati Općinsko Vijeće i

to: opomena, javna opomena uz javno objavljivanje na sjednici Općinskog vijeća i javna opomena uz objavljivanje mjere u Službenom glasniku općine Banovići.

X - PODRŠKA KODEKSU

Član 40.

Izabrani zvaničnici će se upoznati sa sadržajem i suštinom ovog Kodeksa i njegovim principima sa potpisanom izjavom da ih prihvataju i podržavaju.

Član 41.

Njihova je obaveza da svojom aktivnošću osiguraju promociju ovog kodeksa, kako u javnosti tako i u medijima.

Član 42.

Zakon o sukobu interesa i Zakon o državnoj službi posebno tretira niz odluka ponašanja kojih se izabrani zvaničnici trebaju pridržavati, a koji su sankcionisani ovim Zakonima.

Član 43.

Predmetni kodeks stupa na snagu danom usvajanja, a njegovim usvajanjem stavlja se van snage Kodeks ponašanja kao osnov političkog integriteta izabranih zvaničnika općine Banovići broj 12/01-02-282/05 od 30.11.2005. godine, objavljen u Službenom glasniku općine Banovići broj 13/2005.

Član 44.

Predmetni kodeks će se po usvajanju od strane Općinskog vijeća objaviti u Službenom glasniku Općine Banovići i na web stranici Općine Banovići te će se na taj način osigurati njegova dostupnost najširoj javnosti

Broj: 12-04-101/22

Banovići, 07.04.2022.godine

PREDSJEDAVALJUĆI OPĆINSKOG VIJEĆA

Lapčević Robert, s.r.